

## **Diskursu Embaixadora Austrália nian – 5 Dezembru 2024**

Wainhira mantein-dame Australianu sira to'o iha Timor-Leste hodi lidera forsa INTERFET iha fulan Setembru nia rohan tinan 1999, sira ajuda hakotu violénsia no destruisaun ne'ebé mosu hafoin Konsulta Populár. Sira mós fó sinál ba chegada husi programa assisténsia umanitária internasionál ida-ne'ebé oportunu.

Iha tempu ne'ebá, Austrália nia apoiu ba esforsu umanitáriu internasionál maka ami-nia kontribuisaun boot liu ba krize umanitária ida. No ida-ne'e fó sinál ba inísiu ba saida maka ohin ita iha ne'e atu hanoin no reflete: tinan 25 kooperasaun dezvoltimentu nian entre Austrália no Timor-Leste.

Faze dahuluk husi assisténsia dezvoltimentu Austrália nian ne'ebé sentradu iha assisténsia emerjénsia. Iha tempu ne'ebé resposta umanitária internasionál konklui iha meadu 2000, Austrália nia apoiu tranzita ona ba assisténsia rekonstrusaun no dezvoltimentu. Austrália sente orgulhu tanba hola parte iha apoiu ba restaurasaun independénsia no tulun esforsu rekonstrusaun lalais. Ida-ne'e tuir fali ho apoiu ba esforsu impresionante sira konstrusaun estadu nian ne'ebé lidera husi Timor-Leste, no aprofundamentu ba ita-nia kooperasaun iha tinan sira tuir mai.

Ita haree ona Timor-Leste, nasaun joven ida, mosu nu'udar demokrasia ida-ne'ebé forte no estável ho ekonomia ida-ne'ebé nakloke no liberál, no progresu ne'ebé metin kona-ba dezvoltimentu umanu no ekonómiku. Liberdade imprensa no asesu públiku ba informasaun apoia debate públiku ne'ebé moris. Ami mós impresionadu atu haree oinsá Timor-Leste mós buka, ho laran-luak, atu fahe Ita-boot nia esperiénsia no matenek ho

estadu sira seluk ne'ebé afetadu husi konfliktu liuhusi knaar lideransa ida iha g7+.

Ita-nia parseria ho Timor-Leste importante tebes ba Austrália. Hanesan Ministra Negósiu Estranjeiru Austrália nian, Penny Wong, hatete iha tinan kotuk, ita importante ba malu tanba ita fahe rejiaun ida no futuro ida. Estabilidade, seguransa, reziliénsia, no prosperidade ita-nia nasaun rua nian sei interligadu nafatin.

Ami-nia parseria sentradu iha apoiu Timor-Leste nia prioridade, programa no política rasik. Nu'udar Timor-Leste nia instituisaun no sistema sira sai maduru ona, Austrália muda ona apoiu ba aprosimasaun hametin sistema – apoia governu bainhira harii kapasidade, efisiénsia no sustentabilidade. Iha realizasaun barak ne'ebé notavel.

Tuir krize COVID-19, Austrália fó apoiu orsamentu diretu ba governu hodi ajuda impulsiona rekuperasaun ekonómika. Modelu ida-ne'e rekoñese forsa sira husi sistema jestaun finanseira no relatório Timor-Leste nian, no ami kontinua fó apoiu orsamentu to'o ohin loron.

Ohin kalan, bainhira ita celebra tinan 25 kooperasaun dezvoltimentu nian, ha'u mós haksolok atu fó sai lansamentu Planu Parseria ba Dezenvolvimentu foun Austrália-Timor-Leste nian. Planu Parseria Dezenvolvimentu ida-ne'e reflete ita-nia prioridade sira ne'ebé fahe ba tinan lima tuir mai, no prinsipiu importante sira kona-ba oinsá ita servisu hamutuk. Obrigado ba maluk sira hotu iha ne'e ne'ebé kontribui durante konsulta sira.

IX Governu Konstitusionál Timor-Leste iha ajenda ne'ebé klaru. Austrália nia programa dezvoltimentu aliña metin ho prioridade hirak ne'e, no Planu Estratéjiku Dezenvolvimentu Timor-Leste 2011-2030.

Ami nia parseria dezvoltimentu ohin loron no ba futuru bazeia ba respeito ba malu, interesse ne'ebé fahe hamutuk, no responsabilizasaun. Kompromisu ida ba dezvoltimentu ne'ebé lidera lokál sai nafatin xavi/ fuan/ sentru iha ami-nia kooperasaun, konsistente ho valór ne'ebé Timor-Leste fó ba dezvoltimentu ne'ebé lidera no propriedade nasaun nian no prinsípiu sira ne'ebé orienta envolvimentu internasionál, hanesan trasa ona husi g7+ iha Akordu Foun ba Envolvimentu iha Estadu Frajil sira.

Iha tinan lima tuir mai, Governu Austrália sei implementa mudansa importante ba ami-nia parseria dezvoltimentu ho Timor-Leste partikularmente:

- Hasa'e apoiu ba Timor-Leste nia ekonomia azul;
- Investe liután iha dezvoltimentu abilidade no reintegrasaun traballadór PALM Timor-oan sira hodi hasa'e oportunidade empregu iha rai-laran;
- Investe barak liu iha dezvoltimentu setór privadu; no
- Fornese apoiu ne'ebé aumenta ba reziliénsia comunidade nian.

Hamutuk ho mudansa sira-ne'e, ami sei kontinua atu apoia prioridade xave sira governu nian, inklui prestasaun servisu ho kualidade iha saúde no edukasaun; no apoiu ba kreximentu ekonómiku no diversifikasaun, konetividade, no adaptasaun ba mudansa klimátika. Austrália mós sei kontinua kooperasaun ne'ebé apoia Timor-Leste nia estabilidade, seguransa no reziliénsia, no apoia Timor-oan hotu-hotu atu iha igualdade buras no prósperu.

Rekoñese papél krítiku ne'ebé organizasaun sosiedade sivíl sira hala'o iha advokasia ba reforma sira no hadi'a asesu universál ba servisu esensiál sira, ami mós sei fornese apoiu alvu ba organizasaun sosiedade sivíl sira.

Favor aproveita kalan ida-ne'e no uza tempu uitoan hodi vizita kabina sira, ne'ebé ami hein katak sei fó sabór ki'ik ida kona-ba luan no kle'an parseria dezvoltamentu Austrália no Timor-Leste nian.

Obrigada.